

欽定八旗通志卷九十九

學校志六

順天府學生員

順治八年三月吏部言旗下子弟率多英才可備
循良之選但學校未興制科未行耳

先帝在盛京愛養人才開科已有成例今日正當舉行臣
等酌議滿洲蒙古漢軍各旗子弟有通文藝者提
學御史考試取入順天府學鄉試作文一篇會試

作文二篇優者准其中式照甲第除授官職則人知向學進取有階矣

詔從所請

是年題准滿洲蒙古漢軍子弟歸順天府考試共取生員三百名滿洲一百二十名蒙古六十名漢軍一百二十名其滿洲蒙古子弟令內院禮部會同考試通滿漢文者繙譯漢字文一篇通滿文者作滿文字一篇漢軍子弟令順天學院考試與民

童一體出題

九年題准漢軍考取廩膳生員二十名增廣生員
二十名不論旗分聽學院考取歸併順天府學照
例每歲出貢二名其漢軍廩生俱有圈撥地畝不
給廩餼

十三年題准減定考取生員名數滿洲八十名蒙
古四十名漢軍一百名

十四年

諭停止八旗考試

康熙六年題准八旗有願作漢文考試者各都統
開送禮部移送順天學院以滿洲蒙古另編一號
漢軍與漢人同場考試文優者卽入順天府漢生
員額數內

九年題准八旗滿洲蒙古取生員四十名漢軍取
生員四十名

又題准滿洲蒙古漢軍應試者照漢童生例禮部

轉劄順天府府丞先行錄取移送學院考試

十年議准漢軍照舊例出貢滿洲蒙古既作漢文一體考試亦照漢軍例設廩生二十名增生二十名每年出貢二名

又議准八旗新舊生員內通行選拔文行兼優者滿洲蒙古起送二名漢軍起送二名入監肄業

互見

國子監

十二年題准八旗照漢人生童歲科兩考例一體

金定人於通志 卷九十一
考試

十五年十月議政王大臣疏言

朝廷定鼎以來雖文武並用然八旗子弟尤以武備爲
急恐專心習文以致武備懈弛今值用武之際若
令八旗子弟仍與漢人一體考試必偏尚讀書有
誤訓練現今將每佐領下一人在監肄業已自足
用除現在生員舉人進士錄用外嗣後請將旗人
考試生員舉人進士暫令停止

詔從之

二十六年

恩詔八旗准同漢人一體考試遵

旨議定滿洲蒙古照舊例取生員四十名漢軍減二十名
二十八年三月兵科給事中能泰疏請考取滿洲
生員宜試騎射

諭曰騎射本無碍學問考取舉人進士亦令騎射倘將不
堪者取中監箭官及中式人一併治罪

是年定滿洲蒙古生員設廩生二十名增生二十
名每年出貢二名漢軍生員設廩生十名增生十
名每年出貢一名

三十三年題准八旗滿洲蒙古原額取生員四十
名今將鑲黃等三旗內府滿洲佐領管領并五旗
王府內滿洲佐領俱歸併八旗滿洲蒙古考試應
將八旗滿洲蒙古生員量增二十名共取進六十
名又八旗漢軍原額取生員二十名今將鑲黃等

三旗內府漢佐領并五旗王府內漢佐領俱歸併
八旗漢軍考試應將八旗漢軍生員量增十名共
取進三十名

六十一年奉

恩詔直省儒學增廣學額一次大學加取七名中學加取
五名小學加取三名隨於次年議定滿洲蒙古照兩大
學加取十四名漢軍照一大學加取七名

雍正元年正月奉

上諭八旗舉人生員內有在護軍執事人行走者俱著退
回若係生員給與二兩錢糧米石係舉人給與三兩錢
糧米石令伊等得以讀書

二年覆准八旗秀才

特恩給與錢糧養贍讀書若無考校恐或怠於誦讀令該
旗都統於歲考前將領錢糧秀才備造清冊咨部
轉送學政照考漢秀才例嚴加校閱考居前等者
照常給領居四等以下者停其給發遇下次考居

一等二等三等照漢廩生開復例仍給原領錢糧
如四等不願再考卽將學冊除名聽其復歸護軍
驍騎當差

是年八月提督順天學政吳襄奏言滿洲蒙古漢
軍生員科歲兩試理應遵例赴考查歷年考冊生
員歲考者不及十分之一其不赴科考者該教官
概以考試載入冊內仰請

勅下八旗都統嗣後遇歲科兩試之期交各佐領務將生

員催令赴試如有患病等實情令預行呈明該教官轉爲詳報無故不赴試者卽行褫革其駐防別省官兵之子弟亦令造冊詳報照例補考再入旗漢軍武生亦多不赴歲考嗣後除隨往外省駐防者該教官造冊報名外其在京之武生務令赴試如有患病亦令據實呈報有擅行規避不考者照例革退至生員年老有疾者照漢生員例告休給衣頂註冊其武生亦照此例舉行再直省廩增額

數府學四十州學三十縣學二十順天府學因兼
大宛二縣廩增各八十今八旗滿蒙廩增各二十
名漢軍廩增各十名八旗入學額數倍多於外府
州縣而廩增額數不但少於順天並且不及外府
州縣人多額少似屬不均請照漢生員例斟酌增
補禮部兵部議覆俱如所請其廩增之額應於原
額外滿洲蒙古各加四十名共各六十名漢軍各
加二十名共各三十名奉

旨依議

四年六月吏部議奏八旗生員雖屬順天府教授
管轄但漢教授並不將旗下生員與漢生員一例
教訓考試則生員等何以知所勸懲請於順天府
學添設滿教授一員訓導一員禮部由滿洲進士
舉人貢生內考試擇其文理優通者擬定正陪咨
送臣部帶領引

見補授係進士舉人以爲教授係副榜貢生以爲訓導令

其每月考試文章兼考騎射如生員內有文理不
通行止不端者令教授詳學臣革退如教授等有
懶惰溺職者令學臣順天府府丞題叅奉

旨依議

謹案是年以正紅旗滿洲副榜貢生洪德元爲教
授錄白旗滿洲副榜貢生海齡爲訓導洪德元恭
紀本末勒石學宮文曰
國家建立學宮宏獎士類訓飭培養之法超越歷代字
內讀書敦行之士彬彬雅雅儲才以待用者不可
勝紀我

皇上御極之初卽
躬詣太學降輦趨拜行釋奠禮

命司成講學諸生圖橋門而聽者數千人蓋
聖心於人材最重故典禮爲獨優也臣竊惟八旗多士半

出於功勲之子弟而肄業又兼騎射文章故從前
秉鐸者往往不能董率然考諸周禮師氏之職凡
國之貴冑子弟學焉又大胥之職春合諸學秋合
諸射以考其藝而進退之王制曰習射上功習鄉
尚齒射義曰諸侯歲獻貢士於天子天子試之於
射宮後世教士之法寢以文重而古制不講久矣
夫元老可爲師中之丈人侍從可爲疆圉之扞禦
井田可寓營陳樽俎可以折衝安在志正體直之
道非學官所當習而勲舊之裔不可以詩書羽箭
造就之以成其材歟方今

聖天子鼓舞作人之化視滿漢爲一體文治光華徧於六
合當茲

特設滿洲儒學德元等首膺蓋教之任敢不欽承
膚應殫心竭力使多士遵循砥礪乎今酌定考課之法每

月課文於貢院較射於太學文非徒操觚爲立言
立德之本射不惟中的有比禮比樂之方旣以涵
養其內復以整束其外俾學業日富品行日端異
時爲鹽梅立勲伐皆基於此夫

聖天子興賢建學之至意千萬世率由無斁是宜勒石以
垂後且使多士於藏修游息之地肅然若有所觀
法而不敢視爲故事將必交相勸勉而人材輩出
然則

帝澤之霑被寧有涯涘哉

五年三月奉

上諭士子讀書應試須專心講習方可望其成就八旗舉
人生員內有護軍執事行走者朕念其用度艱難恐致